

Penghargaan Untuk Rakyat: Harap jadi jambatan pemulihan ekonomi



ABU SUFIAN
ABU BAKAR

PENGHARGAAN Untuk Rakyat diumumkan Perdana Menteri, Datuk Seri Anwar Ibrahim melalui perutusan RM2.5 bilion merangkumi bantuan tunai universal, subsidi bersasar dan insentif pengangkutan bertujuan menangani isu kos sara hidup.

Dari sudut teoritikal, inisiatif ini mencerminkan pendekatan dasar fiskal mengembang yang menggabungkan elemen bantuan langsung dengan rangsangan ekonomi. Walau bagaimanapun, keberkesanan dasar sedemikian memerlukan analisis kritikal terhadap beberapa dimensi utama iaitu impak ekonomi makro, kelestarian fiskal, kesan sosial jangka panjang dan implikasi terhadap struktur ekonomi negara.

KELEGAAN SEGERA

Rakyat akan merasai kelegaan segera dalam paket bantuan ini. Bantuan tunai RM100 kepada 22 juta rakyat dewasa merupakan langkah yang belum pernah berlaku dalam sejarah negara.

Ditambah dengan penurunan harga petrol kepada RM1.99 seliter dan pengecilan kadar tol, rakyat akan merasai pengurangan beban kewangan ketara, terutamanya bagi golongan berpendapatan rendah dan sederhana.

Pendekatan bantuan universal ini juga memberikan rasa keadilan sosial yang tinggi. Tidak kira latar belakang politik, status sosial atau lokasi geografi, setiap warganegara dewasa berhak mendapat bantuan yang sama. Ini adalah langkah progresif yang menunjukkan kerajaan benar-benar prihatin terhadap kesejahteraan rakyat tanpa diskriminasi.

POTENSI RANGSANGAN EKONOMI

Dari perspektif makroekonomi, suntikan wang tunai sebanyak RM2.5 bilion ke dalam ekonomi akan mencetuskan kesan pengganda yang positif. Wang ini akan segera dibelanjakan rakyat untuk keperluan



PENGHARGAAN Untuk Rakyat sudah pasti akan memberi kelegaan yang diperlukan dalam menghadapi cabaran kos sara hidup yang meningkat ketika ini.

asas, merangsang aktiviti perniagaan tempatan dan meningkatkan pungutan cukai secara tidak langsung. Ini selaras dengan teori ekonomi Keynesian yang menekankan kepentingan perbelanjaan kerajaan untuk merangsang permintaan agregat ketika ekonomi memerlukan dorongan.

Lebih menarik lagi, had masa bantuan Sumbangan Asas Rahmah (SARA) dari Agos hingga Disember dapat memastikan wang tersebut benar-benar dibelanjakan sekali gus memaksimumkan kesan rangsangan ekonomi.

Pendekatan penyasaran subsidi petrol juga menunjukkan kematangan dalam pengurusan fiskal, di mana subsidi diberikan kepada mereka yang benar-benar memerlukan sambil mengurangkan pembaziran kepada warganegara asing.

KERISAUAN JANGKA PANJANG

Dua cabaran utama memerlukan perhatian kritikal. Pertama, risiko sindrom kebergantungan fiskal yang boleh mengurangkan produktiviti ekonomi.

Kajian empiris menunjukkan negara-negara dengan program bantuan tunai berulang sering mengalami penurunan kadar penyertaan tenaga buruh. Di Malaysia, dengan kadar produktiviti buruh yang hanya meningkat 2.1 peratus pada 2024 berbanding

sasaran 3.5 peratus, bantuan berterusan mungkin memperlambatkan lagi usaha peningkatan kemahiran dan inovasi.

Kedua, implikasi terhadap kelestarian fiskal adalah kritikal. Walaupun pertumbuhan Keluaran Dalam Negara Kasar (KDNK) mencapai 4.4 peratus, nisbah hutang kepada KDNK pada 2024 adalah 60.4 peratus, hampir menghampiri had 65 peratus yang ditetapkan kerajaan.

Perbelanjaan tambahan meningkatkan defisit fiskal yang sudah mencecah 5 peratus daripada KDNK pada 2024. Jika trend subsidi dan bantuan ini berterusan tanpa reformasi hasil, Malaysia berisiko menghadapi krisis fiskal seperti Greece pada 2010, di mana nisbah hutang melampau menyebabkan kemelesetan ekonomi yang teruk.

SUBSIDI BERSASAR

Pendekatan subsidi bersasar petrol RON95 mencerminkan dilema dasar lebih kompleks, terutamanya apabila dianalisis berdasarkan Perluasan Cukai Jualan dan Perkhidmatan (SST) yang dilaksanakan kerajaan dalam tempoh sama. Strategi ini menunjukkan paradoks fiskal: kerajaan memberikan bantuan dengan sebelah tangan sementara mengutip hasil tambahan melalui cukai yang diperluaskan dengan tangan lain.

Perluasan SST kepada lebih

banyak sektor, termasuk perkhidmatan digital dan e-dagang, dijangka menjana tambahan hasil RM3 bilion hingga RM5 bilion setahun. Walau bagaimanapun, pemberian subsidi petrol dan bantuan tunai bernilai RM2.5 bilion secara serentak menimbulkan persoalan tentang kecekapan pengalihan sumber.

Selain itu, pelaksanaan subsidi bersasar memerlukan infrastruktur teknologi yang canggih untuk memastikan ketepatan sasaran. Pengalaman Indonesia dengan program subsidi bahan bakar bersasar menunjukkan kos pentadbiran boleh mencecah 15 hingga 20 peratus daripada jumlah subsidi.

Di Malaysia, sistem penyasaran melibatkan 18 juta kenderaan memerlukan platform digital yang kukuh dan proses pengesanan telus.

Lebih membimbangkan, pengecilan subsidi petrol pada RM2 seliter bertentangan dengan komitmen Malaysia terhadap Perjanjian Paris dan matlamat emisi sifar bersih menjelang 2050. Ia mencanggah isyarat bercanggah kepada pasaran dan pengguna mengenai arah dasar tenaga negara.

IMPLIKASI POLITIK DAN SOSIAL

Tidak dapat dinafikan pengumuman ini mempunyai nilai politik yang tinggi. Menjelang tempoh kritikal dalam pentadbiran kerajaan, bantuan universal ini sudah

pasti meningkatkan sokongan rakyat. Walau bagaimanapun, dasar fiskal sepatutnya dibuat berdasarkan keperluan ekonomi jangka panjang, bukan semata-mata untuk meraih sokongan politik.

Dari sudut sosial, walaupun bantuan ini membantu mengurangkan ketidaksamaan pendapatan dalam jangka pendek, ia tidak menangani punca masalah asas kos sara hidup yang tinggi. Inflasi makanan yang berterusan, kenaikan kos perumahan dan kekurangan peluang pekerjaan bergaji tinggi masih menjadi cabaran struktural yang memerlukan penyelesaian jangka panjang.

SEIMBANG

Dasar fiskal ini percubaan untuk mengimbangi keperluan segera rakyat dengan kestabilan ekonomi jangka panjang. Walau bagaimanapun, kejayaan sebenar bergantung kepada kecekapan pelaksanaan dan keupayaan kerajaan untuk memastikan bantuan ini disertai dengan reformasi struktural yang lebih mendalam.

Kerajaan perlu memberikan bantuan segera. Dalam masa sama meningkatkan produktiviti ekonomi, kemahiran tenaga kerja dan daya saing industri.

Pelaburan dalam pendidikan, infrastruktur dan inovasi adalah kunci untuk memastikan Malaysia tidak bergantung kepada bantuan tunai sebagai penyelesaian jangka panjang.

Dari sudut kemanusiaan, langkah Penghargaan Untuk Rakyat patut dipuji. Namun, keberkesanan jangka panjangnya bergantung kepada keupayaan kerajaan untuk memastikan bantuan ini tidak menjadi 'dadah' yang memabukkan sebaliknya menjadi jambatan kepada pemulihan ekonomi mampan.

Rakyat berhak langkah ini tetapi mereka juga perlu sedar tiada bantuan yang percuma. Apa yang diberikan hari ini mesti dibayar melalui cukai, prestasi ekonomi dan produktiviti masa hadapan.

DR. Abu Sufian Abu Bakar ialah Pensyarah Kewangan Puset Pengajian Ekonomi, Kewangan & Perbankan, Universiti Utara Malaysia (UUM) dan Timbalan Pengerusi Forum Ekonomi Mahasiswa.